



► **M. Fernand Kartheiser** (ADR).- Villmools Merci, Madame President. Dir Dammen an Dir Hären, och Merci un de Rapporteur. Ech mengen, et si vläicht e puer Klenggekeeten, déi een awer sollt hei nach eng Kéier ënnersträichen. Mir sinn natierlech mat deem Gesetz d'accord. Mä wann een esou e Gesetz mécht iwwer och d'Fusioun vu verschiddene Servicer am Beräich vun der Informatik, dann ass et vläicht, wéi och verschidde Virriedner et uge-deit hunn, ëmmer wichteg, op d'Sécherheet vun den Donnéeën hinzewisen.

An am Kader vun dëser Prozedur hu mir elo net gesinn - et ass vläicht ee gemaach ginn, mä mir hunn en net gesinn -, datt den Avis vun der Datenschuttkommissioun gefrot gi wär. Dat wär awer wahrscheinlech net onnéideg gewiescht. Et ass ëmmer eng sensibel Matière. An op jidde Fall géife mer lech encouragéieren, Madame Minister, déi Kommissioun ëmmer esou vill wéi néideg a wéi méiglech ze bedeelegen, wann esou Texter gemaach ginn.

Dat Zweet ass, den Här Adam, mengen ech, huet et elo gesot, mir sollten nach méi Donnéeën sammelen an esou weider. Ech froe mech just, ob dat néideg ass. Wann ee sech wëllt haut eng Iddi iwwert den Zoustand vum Schoulsystem verschafen, mengen ech, brauch een net onbedéngt méi Donnéeën ze sammeln, mä et soll ee mat de Patrone schwätzen oder mat deene Leit, déi Examensresultater mussen auswäerten. Ech mengen, déi kënnen genuch Informatiounen iwwert den Zoustand vun eisem Schoulsystem ginn.

Awer eng Missioun vun deem neien, fusionéierten Zenter kéint et och sinn - et steet zwar net am Gesetz, mä et wär vläicht sënnavoll, Madame Minister -, fir och den Zentrum ze bedeelege bei där Aarbecht, déi gemaach gëtt, fir d'Schüler un e verantwortungsvollen a sécheren Émgang mam Internet ze gewinnen. Wann een esou vill Kompetenz, Fachkompetenz zesumme faasst, wéi mir et elo hei mat deem Gesetz am Éducatiousministerium maachen, dann, mengen ech, sollt een dat och benotzen zu deem Zweck. Dir hutt et vläicht wëllen, et ass awer net elo am Gesetz als Missioun opgezielt.

Dann nach eng lescht Bemierkung iwwert déi finanziell Konsequenzen. Ech weess och net, ob ech den Optimismus vun der CSV an deem do Punkt esou ouni Weideres kann deelen. Et ass keng Fiche financière, weinstens keng, déi mir gesinn hätten, bei deem Gesetzesprojekt do derbäi gewiescht. Et gëtt eng nei Carrière oder et ginn nei Emploie geschafen. Wéi d'Répercussionen op aner Coûte sinn, ass net bekannt. Madame Minister, mir wärend frou, wann Dir eis do vläicht kéint weider Informatiounen ginn.

Ech soen lech Merci.

► **Mme la Présidente**.- Merci. De leschten agedroene Riedner op eiser Lëscht ass den honorabelen Här Colombara.

► **M. Jean Colombara** (Onofhängeg).- Jo, Madame Presidentin, Merci fir d'Wuert. E schéine Merci un de Rapporteur, den Här Diederich. Et mécht Sënn, dass déi zwee Servicer zesumme geluecht ginn an dogéint hu mer nächst anzuwenden. Ob dat elo finanziell gutt wäert sinn, dat wäert d'Zukunft eis weisen. Den Här Kartheiser huet grad hei vun der Fiche financière geschwat. Domat si mer d'accord. Et wär besser, wa mer déi eng Kéier géife gewise kréien, well nei Poste geschafe ginn.

An ech bestinn awer drop, dass déi Traitements de données personnelles mussen geschützt ginn. An dat gesot, Madame Presidentin, gi mer den Accord zu dësem Gesetzesprojekt.

Merci.

► **Mme la Présidente**.- Merci. Domat ass eis Riednerlëscht ofgeschloss an d'Regierung huet d'Wuert. Madame Minister, wann ech gelift.

► **Mme Mady Delvaux-Stehres**, *Ministre de l'Éducation nationale et de la Formation professionnelle*.- Merci, Madame Presidentin. Ech wollt all menge Virriedner, besonnesch dem Rapporteur, dem Fernand Diederich, Merci soe fir d'Présentatioun vun dësem Projet. Ech freeë mech iwwert de Support, deen dëse Projet kritt. Dat ass eigentlech och net erstaunlech, well et geet hei ëm eng Reorganisatioun vun zwou Administratiounen. A mir ass et wichteg, dat hei ze ënnersträichen.

Mir haten e Service informatique am Ministère, deen haaptsächlech zoustänneg war, fir d'Informatik administrativ mat de Gebaier ze regelen, wou dann och eis Datebanke géréiert ginn. An derniewent gëtt et bis haut, an dee gëtt jo

dann elo fusionéiert, de Centre de Technologie vun der Éducation, deen haaptsächlech zoustänneg war fir d'Mise à disposition an den Entretien vun der ganzer Informatik, vun der Hardware an der Software, déi an de Klasse gebraucht gëtt.

Vu dass déi zwou Utilisatiounen ëmmer méi zesummewuessen an et schwéier gëtt, engem ze erklären, dass den CTE zwar kann e Computer zur Verfügung stelle fir e Klasesall, mä awer keen an d'Sekretariat vun engem Lycée setzen däerf, huet et eis logesch geschéngt, dass mer probéieren, déi zwee Servicer zesummenzeleeën.

Dat ass also e Service, deen e grouse Support logistique gëtt, mä en ass net zoustänneg fir dee pädagogesche Volet, dee selbstverständlech vun den Enseignanten, vum SCRIPT an deem Departement exekutéiert gëtt. An dofir kann ech alleguer d'Leit berouegen. Dat Gesetz, wat eréischt d'Chamber gestëmmt huet am März vun dësem Joer, wat alles concernéiert, d'Sécherheet vun den Donnéeën, dat applizéiert sech natierlech op dës Administratioun. Déi schafft an dem Kader vun deem Gesetz. Dofir hu mer och net misse elo... Fir d'Büroen ëmzeverdeelen, brauche mer natierlech net den Avis vun der Datenschuttkommissioun ze froen.

Wichteg ass et mer och nach, fir ze soen, dass mer natierlech Leit schaffen hunn de Moment am Centre de Technologie de l'Éducation, mir hunn der am Service informatique: Iwwert dëst Gesetz gi keng nei Leit agestellt! Wahrscheinlech ass dat e Feeler, well, wéi den Här Adam richteg gesot huet, et weess een net, wat mer nach alles brauchen an der Zukunft an der Informatik.

Et ass net e Gesetz, wat nei Leit astellt. Mä déi Leit, déi do sinn, ginn an deselwechte Konditiounen vun engem Service an deen aneren iwwerholl. An dofir soen ech alleguer deene Leit, déi an deene Servicer schaffen an déi eng gewësse Mobilitéit mussen beweisen - an déi déi Disponibilitéit och hunn - schonn am Viraus Merci, weil aus Erfahrung weess ech, dass et net einfach ass, Servicer zesummenzeleeën respektiv d'Leit vun engem Service an deen aneren ze bewegen.

An lech soen ech Merci fir déi breet Zoustëmmung.

► **Mme la Présidente**.- Merci, Madame Minister.

Domat ass d'Diskussioun elo ofgeschloss a mir kéimen zur Ofstëmmung.

Vote sur l'ensemble du projet de loi 6503

Dann de Vote par procuration. Domat ass de Vote ofgeschloss an de Projet mat 58 Oui-Stëmmen ugeholl.

Ont voté oui: Mmes Diane Aehm, Sylvie Andrich-Duval, Nancy Arendt, MM. Fernand Boden, Lucien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Hauptert, Ali Kaes, Marc Lies, Mme Martine Mergen, MM. Paul-Henri Meyers, Marcel Oberweis, Gilles Roth, Jean-Paul Schaaf, Mme Tessy Scholtes, MM. Marc Spautz, Robert Weber, Lucien Weiler, Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, MM. Fernand Diederich, Georges Engel, Ben Fayot, Claude Haagen, Jean-Pierre Klein, Lucien Lux, Mme Lydia Mutsch, MM. Roger Negri, Ben Scheuer et Roland Schreiner;

MM. André Bauler, Eugène Berger, Xavier Bettel, Mme Anne Brasseur, MM. Fernand Etgen, Alexandre Krieps, Claude Meisch, Mme Lydie Polfer (par M. Carlo Wagner) et M. Carlo Wagner;

MM. Claude Adam, François Bausch, Félix Braz (par M. Claude Adam), Camille Gira, Henri Kox, Mmes Josée Lorsché et Viviane Loschetter;

MM. Gast Gibéryen et Fernand Kartheiser;

M. Jean Colombara;

M. Serge Urbany.

Mir kéimen dann zum nächste Projet de loi. Dat ass de Projet 6550 iwwert de Beruff vum Affekot. D'Riedezäit ass nom Basismodell festgeluecht, an ageschriwwen hu sech bis elo: den Här Bëtzel, den Här Klein an den...

(Interruptions)

Eng Sekonn. Dat ass richteg! Ech hunn ee Projet iwwersprongen, an net dee mannsten, an zwar de Projet 6522 iwwert d'Schafe vum Clierfer Lycée. An dee Modell ass net nom Basismodell, mä nom Modell 1 festgeluecht. An do sinn ageschriwwen: den Här Eicher, den Här Bauler, den Här Adam, den Här Colombara... ah, virdrun nach den Här Kartheiser - pardon -, den Här Colombara.

D'Wuert huet elo als Éischt de Rapporteur vum Projet de loi, an dat ass den honorabelen Här Claude Haagen. Dann hutt Dir och direkt d'Wuert, Här Rapporteur.

12. 6522 - Projet de loi portant création d'un lycée à Clervaux

Rapport de la Commission de l'Éducation nationale, de la Formation professionnelle et des Sports

► **M. Claude Haagen** (LSAP), *rapporteur*.- Madame Presidentin, Dir Dammen an Dir Hären, den 9. Januar 2013 huet d'Madame Minister vun der Éducation nationale dëse Gesetzesprojekt 6522 iwwert d'Kreatioun vum Clierfer Lycée am Parlament deponéiert. De Projet de loi gouf vun de Beruffschamberen a vum Statsrot aviséiert. Op Basis vun deenen Avisen huet d'Éducatiouskommissioun, nodeems ech vun där Kommissioun als Rapporteur designéiert gi sinn, de Rapport parlementaire den 18. Abrëll vun dësem Joer ugeholl.

Madame Presidentin, fir d'Éischt géif ech gären e puer Wuert iwwert de Verlaf vum Projet vum Clierfer Lycée selwer soen. Ech erënnere drun, dass mir d'Gesetz iwwert de Bau vum Clierfer Lycée, also de Projet de loi 6488, schonn den 30. Januar vun dësem Joer gestëmmt hunn. Dësen ass mëttlerweil d'Gesetz vum 22. Februar 2013 iwwert de Bau vum Clierfer Lycée ginn. Mir haten deemools schonn an allen Detailler iwwert de Plan sectoriel «Lycées» geschwat, deen 2001 schonn d'Noutwendegkeet vun engem Lycée am Norden festgehalen hat. Dëst och opgrond vun engem Vide scolaire, deen et jo an där Géigend vum Land gëtt.

Ech wollt haut nëmme kuerz op d'Objektiver vum Plan sectoriel agoen. Dës sinn ënner anere: zousätzlech schoulesch Capacitéite schaffen, d'Dezentralisatioun vun der schoulescher Offer a manner Déplacementer fir d'Schüler, fir bei d'Lycéeën ze kommen. Déi Objektiver gi ganz kloer vum zukünftege Clierfer Lycée erfüllt.

D'Schüler vu folgende Gemenge gehéieren zu der sougenanntener „Zone de recrutement“ vun dësem Lycée: d'Gemenge vu Clierf, Park Housen, Élwen, Wäisswampech, Wëntger a Kiischpelt. All d'Gemenge vum Clierfer Kanton si mam öffentlechen Transport u Clierf ugebonnen, mä d'Offer muss awer nach verbessert ginn, haaptsächlech fir d'Géigende Wäisswampech a Wëntger.

D'Schülerpopulatioun vun der Zone de recrutement vum zukünftege Clierfer Lycée ass vun 2000 bis 2011 geklommen, an zwar vu 1.440 op 1.508 Schüler, vun deenen der ronn 700 am Cycle inférieur ageschriwwen sinn. Verschiddener vun deene Schüler, zum Beispill déi vun Housen, Kiischpelt a Wëntger sinn am Moment besser u Wolz oder Ettelbréck ugebonnen a wäerten net onbedéngt sech direkt zu Clierf aschreiwen.

Dofir gesäit dëse Projet de loi och vir, 34 Klassen ze organiséieren, déi sech am Cycle inférieur vum Enseignement secondaire a vum Enseignement secondaire technique souwéi vum Enseignement préparatoire opdeelen, wat fir ronn 480 bis 650 Schüler eng ideal Klassegréisst bedeit. Des Weidere ginn zwou Klasse vu Schüler à besoins spécifiques vun der Édiff integréiert.

De Clierfer Lycée ass ee selbststänneg Lycée, och wann d'Offer am Moment just op de Cycle inférieur beschränkt ass. Mëttelfristeg besteet awer och d'Méiglechkeet, d'Offer vun eben dësem Lycée op de Cycle supérieur ze erweideren, esou dass d'Schüler alleguer vum Kanton Clierf vum Lycée wäerte profitéieren kënnen.

Déi positiv Effekter vum Clierfer Lycée wäerten awer schonn direkt ze spiere sinn. Dëst fir d'Éischt emol fir déi aner Schoulen aus der Géigend. Si ginn entlaascht a si kënnen an Zukunft eventuell méi kleng Klasseneffektiver virgesinn. Dann ass de Lycée zu Clierf natierlech e grouse Virdeel fir d'Schüler an hir Elteren. Manner Schoulweeër, dat heescht och méi Zäit doheem oder méi Disponibilitéit fir extraschoulesch Aktivitéiten.

D'pädagogescht Konzept vum Clierfer Lycée gëtt net am Projet de loi automatesch festgehalen. Am Kader vun der Autonomie vun de Schoulen ass et d'Aufgab vum zukünftegen Direkter oder Directrice a vun der Équipe vun Enseignanten, dat Konzept op d'Been ze setzen a prett ze sinn, wann de Lycée seng Dieren definitiv opmécht. Et kann een awer och elo scho soen, dass de Projet een Encadrement scolaire vun hallwer 8 moies bis 6 Auer owes virgesäit.

An deem Kontext wollt ech nach e puer Wuert zum Artikel 6 vum Projet de loi soen. Dësen Artikel definéiert d'Personal, wat agestellt soll ginn. Et ass ervirzesträichen, dass genuch Kaderpersonal an Éducateure virgesi sinn, déi d'Surveillance solle maachen oder d'Gestioun vun den Atelieren a vun de Salles spéciales. Dat verhënnert, dass d'Proffen oder d'Chargéen Déchargé kréien, fir d'Aktivitéiten ze encadréieren, déi nächst direkt mam Schoulhalen ze dinn hunn. Wann dat nämlech de Fall wier, missten erëm nei Chargéen op begrenzten Zäit

agestellt ginn, fir déi Stonnen ze halen, déi déi nominéiert Enseignanten net kéinten halen.

Dir Dammen an Dir Hären, wéi mir am Januar d'Gesetz iwwert de Bau vum Clierfer Lycée gestëmmt hunn, si mir vill op d'Wichtigkeet vun esou engem Lycée fir de Clierfer Kanton agaan-gen. Esou ee Lycée ka jo ee groussen Impakt op d'Wirtschaft, op de Commerce an op déi kulturell a sportlech Aktivitéite vun der Géigend hunn.

Et wier och wichteg, wann den zukünftege Lycée Kontakt mat de Lycéeën iwwert d'Grenz ewech hätt, an der Grande Région zum Beispill. Dem Clierfer Kanton seng Schülerpopulatioun an den zukünftege Lycée hunn nämlech Spezifitéiten, Charakteristiken, déi duerchaus mat deenen aus de Grenzgéigenden ze vergläiche sinn. Am Kader vu Proffen- oder Schüleraustausch, vu gemeinsame Projeten entre autres wier et interessant a flott, beräichernd och, Erfahrungen an Iddien auszetauschen.

Dat gesot ginn, ech am Numm vun der LSAP-Fraktioun den Accord zu dësem Projet, verweise fir weider Detailler op mäi schrëftleche Rapport a wënschen dem Clierfer Lycée e ganz gudde Start.

Merci.

► **Plusieurs voix**.- Très bien!

► **Mme la Présidente**.- Merci. Den nächsten agedroene Riedner ass den honorabelen Här Emile Eicher. Dir hutt d'Wuert, Här Eicher.

Discussion générale

► **M. Emile Eicher** (CSV).- Merci, Madame Presidentin. Dir Dammen an Dir Hären, fir d'Alleréischts wëll ech dem Rapporteur, dem Här Haagen, villmools Merci soe fir säin ausféierlechen exzellente schrëftlechen an och mëndleche Rapport zum virleiende Gesetzes-text.

Dëse Projet de loi gesäit d'Schafe vun engem Lycée an der Region Clierf vir. Zur Schouloffer gehéiert den ënneschten Zyklus vum klaseschen an technesche Lycée, zu deem de Régime préparatoire zielt. D'Schafung vun Lycée grénnt op der schoulescher Organisatioun, wéi se am Plan directeur sectoriel «Lycées» festgehale gouf. Wéi mir all heibanne wëssen, organiséiert dëse Plang d'Schouloffer an der Optik, fir d'Distanze vun de Schülertransporter ze verréngere, an dëst virun allem zum Avantage vun eise jonke Schüler.

Zum sougenannten Enseignementspol Norde gehéieren deemno d'Kantone Clierf, Wolz, Veianen, Dikrech, Réiden a Miersch, ouni d'Gemenge Luerenzweiler, Hiefenech an d'Fiels. Hei sinn nom Reglement vum 25. November 2005 am Ganze sechs Lycéeën virgesinn, woubäi mir véier technesch Lycéen zielen, ee Lycée mixte mat Dominante classique an enger Annex mat Dominante technique, an ee Lycée mixte mat Dominante technique.

Prioritär profitéieren vum zukünftege Clierfer Lycée d'Kanner aus de Gemenge Clierf, Park Housen, Élwen, Wäisswampech a Wëntger, souwéi och d'Gemeng Kiischpelt aus dem Wolzer Kanton. Woubäi awer bäizefügen ass, datt d'Gemenge Kiischpelt a Wëntger an zwou Aschreiwungszonen affektéiert si ginn, an zwar déi vu Clierf an déi vu Wolz.

De Lycée soll zwësche 486 a 646 Schüler ophuele kënnen, déi dann op 34 Klassen opgedeelt sinn. Eleng dës Schülerzuele weisen drop hin, dass eis Klassen net iwwerfüllt ginn an esou optimal Konditiounen fir eis Kanner geschafe ginn.

Dir Dammen an Dir Hären, Dir kënn lech all heibanne virstellen, datt ech immens houfreg sinn, datt dëse Gesetzestext haut hei gestëmmt gëtt. Houfreg aus zwee Grënn:

Fir d'Alleréischts wäert d'Schafe vun dësem Lycée d'Liewensqualitéit vu ville Jonken aus eiser Region onhalteg verbessern. Besonnesch bei eis am Norden ass et jo e Fakt, datt d'Distanzen oft nach e Stéck méi grouss si wéi soss am Land an datt eis Schüler vill ze vill Zäit um Wee fir an hir Schoul verléieren. Dëst ännert elo an Zukunft an d'Schüler kënnen méi no bei sech doheem an d'Schoul goen. Clierf ass duerch den öffentlechen Transport mat alle Gemengen aus dem Kanton verbonnen, och wa fir verschidde Gemenge wéi Wäisswampech, Wëntger a Park Housen an dëser Hisiicht nach e bëssen nogebessert muss ginn.

Et ass och nach ze bemierken, datt duerch deen neie Lycée zu Clierf bestoend Lycéeën, virun allem déi vu Wolz, Dikrech an Ettelbréck, entlaascht ginn, wat jo och eng gutt Saach ass.

Zweetens géif ech awer och nach gären dat innovatiivt pädagogescht Konzept vum Clierfer Lycée ervirhiewen. Esou bleift hei un éischter Stell festzehalen, datt de Clierfer Lycée d'Ariichte vun zwou Kohabitatiounsklasse vun der Édiff virgesinn huet. Heibäi handelt et sech jo ëm Klassen, déi d'Kanner mat spezifesch Bedürfnisser ophuelen, déi vun Titulair vum der Édiff encadréiert ginn. D'Zil heivunner ass,



déi intellektuell, praktesch a sozial Entwécklung vun dese Kanner ze encouragéieren, souwéi och d'Integratioun respektiv d'Reintegratioun, op d'mannst deelsweis, an den ordinäre Schoulsystem ze favoriséieren.

An de Schoulen, wou dës Kohabitatiounsklasse scho stattfannen, entstinn Versteesdemech a Frëndschaften duerch den Austausch tëscht alle Schüler, ob dat an den Ateliers oder am Sport ass. Dëst Mateneen an de Schoule gëtt scho mat vill Erfolleg an enger Rei vu besonnesch aktive Lycéeën ugebueden, well festgestallt gouf, datt de Kontakt zwëschen de jonke Leit fir jiddweree bénéfique ass.

Regelméisseg Kontakt mat Jugendleche vum nämlechen Alter favoriséiert déi perséinlech Entfaltung vu jonke Leit mat spezifesch Bedürfnisser. Nëmmen esou féiert dese Kontakt och op där anerer Säit zum Ofbau vu Viruerteeler a Beréierungsängscht, also zu méi Akzeptanz an Integratioun tëscht de Jugendlechen.

An enger Regioun vu laange Weeër bis an d'Schoul ass et besonnesch wichteg, wann d'Fonctionnementszäite vum Lycée ugepast sinn. Et ass jo och esou, datt de Clierfer Lycée seng Diere vun hallwer 8 moies bis owes 6 Auer ophuert. An anere Wieder heescht dëst, datt de Lycée eng zolidd Prise en charge vun de Schüler ausserhalb vun de Schoulstonne virgesäit.

Am Exposé des motifs steet, datt niewent engem klasscheschen Encadrement, den Hausaufgaben, de sougenannte Cours d'appui an de Remédiatiounsmoosnamen, awer och kulturell a sportlech a wëssenschaftlech Aktivitéite wäerten offéiert ginn. An dat souguer mat dem Kontakt mat der Berufswelt.

Et entstinn am périscolaire Kader nach zousätzlech fakultativ Léiergänger. Am Kader vun der Autonomie, déi de Lycéeën accordéiert gouf, ass et elo un där neier Direktioun mat hirer Enseignementséquipe, an Zesummenaarbecht mat de kulturellen, wirtschaftlechen a soziale Acteuren aus der Regioun ee spezifesch pädagogesch Projet fir de Clierfer Lycée ze entwéckelen, esou datt hie seng eegen Identitéit entwéckele kann. D'Regioun freet sech elo schonn op eng kreativ an dauerhaft Zesummenaarbecht.

Den Opbau vun dësen neie Partnerschaften stellt eng grouss Erausforderung duer, souwuel fir d'Schoul wéi och fir eis Regioun. Et kéint ee scho bal vun enger Zort Plan d'encadrement périscolaire, engem PEP, fir de Clierfer Lycée schwätzen, wat déi parascolaire Aktivitéite vun de Schüler ubelaangt, och wann an dësem Fall d'Organisatioun net bei de Gemengeverrieder, mä bei der Schoul läit. Mä an der Philosophie, mengen ech, geet et ëm dat nämlecht, an zwar de Schüler eng beschtméiglech Participatioun un intelligente Fräizäitaktivitéiten ze garantéieren.

Wéi gesot ass dëst net nëmmen eng Erausforderung, mä virun allem och eng grouss Chance. Eng Erausforderung, well sech elo déi allermeeschte Fräizäitaktivitéiten ausserhalb vun der Schoul festleeën. Eng Chance, well d'Méiglechkeet besteet, Schüler a Kontakt mat aneren an neie Fräizäitméiglechkeeten ze setzen, déi hinne vläicht nach net bekannt waren; zweetens, och d'Clibb aus der Regioun d'Méiglechkeet kréien, nei Leit an Talenter fir sech ze gewannen; an drëtens, vläicht do komplett nei Fräizäitaktivitéite mat der Schoul an an der Schoul mat der Regioun entstoe kënnen.

Well wichteg wier et och a mengen Aen, fir d'Alleréischts bestoend regional a lokal Aktivitéite mat der zukünftger Schouloffer ze vernetzen. Ech denken do zum Beispill un d'Museksschoul vum Kanton Clierf, eise Jugendtheater vum Cube 521, d'Cité de de l'image oder d'Family of Man oder eis vill Sports- a Fräizäitveräiner.

Da kéint een och op de Wee goen, fir nei Aktivitéiten, jee no Bedürfnis oder Wonsch vun de Schüler, innerhalb vum périscolaire Kader vun der Schoul entsoenzeloossen. Op dës Aart a Weis entsteeft eng Win-win-Situatioun, déi fir all Säit nëmme Virdeeler mat sech bréngt, an zwar an éischter Linn fir d'Schüler selwer, mä awer och fir d'Schoul a fir déi ganz Regioun.

Madame Presidentin, et ass e Fakt, datt iwwert déi lescht Jorzingten de Liewensrhythmus vun de Leit staark evoluéiert huet, an zwar esou, datt d'Kanner ëmmer méi ausser Haus verbréngen. Esou ass et un eise Politiker, elo derfir ze suergen, datt dës Realitéit am Alldag vun de Kanner Rechnung gedroe gëtt. Ech sinn iwwerzeegt, datt dese Gesetzesprojet grad fir dese Problem eng passend Äntwert wäert fannen. Hei denken ech un éischter Stell un d'Wichtigkeet vum Encadrement vun de Schüler, besonnesch vun deenen aus dem ënneschten Zyklus.

Do, wou déi jonk Schüler virun e puer Méint nach an enger Maison relais oder an engem Foyer du jour ënnerbruecht woren, ännert dës Situatioun oft stënterlech mam Ufank vum Lycée. Obschonn si elo an déi grouss Schoul ginn, brauchen dës Kanner eng fest Struktur,

déi si ausserhalb vun de Schoulstonnen opfänkt, fir si an hirer Entwécklung ze förderen an och ze ënnerstëtzen.

Datt explizit an dem Exposé des motifs ze liesen ass, datt den Hausaufgaben niewent dem Appui an de Remédiatiounsmoosnamen eng extra Plaz ageraumt gouf, ass och ze luewen. De Wiessel vum Fondamental an de Lycée bedeit fir vill Schüler eng grouss Ëmstellung. De Wiessel ze assuméieren ass dacks net esou evident fir déi jonk Schüler. Aus dësem Grond ass et ëmsou méi wichteg, datt si den néidege schouleschen Encadrement heifir kréien, dat évidement net ëmmer an ausschlieslech während de Schoulstonne garantéiert ka ginn.

Da wollt ech awer och nach betounen, datt dese Lycée fir eis Nordspëtzt eng eenzegearteg Chance duerstellt. Hei ginn eng Rei nei héichqualifizéiert Aarbechtsplaze geschaaft, déi sécherlech en direkten Impakt op eise Wunnegs- a Wirtschaftsstanduert hunn. Net ze vergiessen, datt déi gréissten Tromp vun dësem klengen Lycée doranner besteet, datt jiddwer Eenzelnen d'Zäit an d'Méiglechkeet huet, sech individuell ze entwéckelen.

Ze bemierke bleift awer och nach, datt d'Viraussetzungen elo schonns do sinn, fir zu engem spéideren Zäitpunkt den Ausbau vum Lycée ze erméiglechen, fir eventuell hei och en ieweschten Zyklus anzeféieren.

Léif Kolleeginnen a Kolleegen, wéi Dir gesitt, bréngt dese Lycée a mengen Aen eng nohalteg Verbesserung fir d'Schüler aus der ganzer Regioun, souwuel wat hir Liewensqualitéit ubelaangt, mä virun allem awer och hir Entwécklung fördert. Ze hoffe bleift, datt dese Lycée sech an der Philosophie vun der Family of Man areit, nämlech deene jonke Leit Wäerter ze vermëttelen, déi zu hirer geeschteger, kultureller a sportlecher Entfaltung bäidroen.

Ofschléissend wollt ech am Numm vun der CSV-Fraktioun eisen Accord zum virleiende Gesetzestext ginn an dem Lycée och vill Chance wënschen.

Villmools Merci fir d'Nolauschteren.

► **Plusieurs voix.** - Très bien!

► **Mme la Présidente.** - Jo. Merci. Mir kënnen dann direkt zum nächsten agedroene Riedner. Dat ass den honorabelen Här Bauler. Dir hutt d'Wuert, Här Bauler.

► **M. André Bauler (DP).** - Merci, Madame Presidentin. Dir Dammen an Dir Hären, nodeems mer am déiwe Wanter de Bauprojet fir de Clierfer Lycée gestëmmt haten, schléit elo matzen am Fréijoer am schéine Mount Mee d'Stonn vum pädagogesche Volet vun dëser zukünftger Schoul.

(*Interruption*)

► **Une voix.** - Très bien!

► **M. André Bauler (DP).** - Spéitstens elo misst jiddwereen d'Plus-value vum Clierfer Lycée fir d'Regioun erkennen. Et ass emol fir d'Éischt d'Proximitéit, manner laang Weeër fir d'Schüler, manner Zäitverloscht am Bus, méi Zäit fir Kreatives a fir ze léieren. Et ass d'Iwwersiichtlechkeet. E méi e klengen Corps enseignant bedeit méi intensiv Kontakter, méi Qualitéit an der Kommunikatioun, méi Zäit fir deen eenzelne Schüler. Et ass och d'Verankerung an der Regioun. Dat heescht, konkret d'Zesummeschaffe mat de wirtschaftlechen a gesellschaftleche Partner aus der Regioun förderen, d'Sproochproblemer an engem méi klengen Kader behandeln a geziilt ugoen. Dat sinn essenziell Ziler, déi ee sech setze muss a wou ee sech och d'Mëttele muss ginn, fir e Maximum u pädagogeschem Erfolleg ze errechen.

Et ass och wichteg, datt de Clierfer Lycée en eegestännege Lycée gëtt. Firwat? En eegestännege Lycée ka säin eegent pädagogesch Konzept ausschaffen. Et kann een net einfach e Konzept vun engem gréisseren Lycée op de Clierfer Lycée calquéieren, trei dem Motto: copy paste. Dës nei Schoul brauch dofir en eegene Rhythmus oder Dagesoflaf, deen de Bedürfnis vun der regionaler Schülerschaft ugepasst ass. Heibäi soll och der inklusiver Approche Rechnung gedroe ginn.

Eng eegestännege Schoul bedeit kee Gependels vun den Enseignanten tëscht de Lycéeën, manner Hektik an domat keen Zäitverloscht fir d'Enseignanten. En eegestännege Lycée huet seng eegen Identitéit, säi pädagogesch Profil. E fuerdert den Zesummenhalt vum Corps enseignant. Et begéint ee sech. Et kann ee sech informell concertéieren. Et muss een net fir alles eng Versammlung aberuffen.

D'DP plädéiert dofir, datt elo esou séier wéi méiglech eng Équipe, en Team zesummegeest gëtt, datt sech ëm d'Opstelle vum pädagogeschen Konzept kümmert. Am Kader vun dësem Konzept sollen d'Enseignanten eeverantwortlech iwwert d'Methoden entscheiden, déi an deem engen oder anere Fall ugewannt wäerte ginn. Wichteg ass, datt sech Leit zesummefannen, déi héich motivéiert sinn, sech mat der

Regioun identifizéieren, am Team schaffe wëllen a sech an déi erfuerdert Literatur, déi mat dem Opstelle vun engem pädagogeschen Konzept verbonnen ass, erschaffen, beziéungsweis un den erfuerderleche Weiterbildungungen deelhuefen.

Ouni dës Viraussetzung geet et net. Doriwwer eraus mussen d'Leit beienee passen, d'Chemie tëscht hinne muss klappen, a si däerfe virun allem net op d'Auer kucken, wa si sech un d'Aarbecht maachen. E Lycée opbauen aus dem wäisse Blat eraus, e liewegt Gebai mat origineller Léierkultur schafen, dat verlaangt Asaz, jo Abnegatioun. Et verlaangt e Coach, deen d'Enseignanten, déi Pionéiergeescht bewiese mussen, zesummenhält, si motivéiert a si esou zu enger zesummegegeschwester Équipe forgiert.

Als DP si mer iwwerzeegt, datt eis Schoulen allgemeng méi Eegeverantwortung, méi Fräiraum, virun allem a pädagogeschen an an didakteschen Froe brauchen. All Schoul soll also hiren eegene Léiermodell entwéckele kënnen. Si soll dat mat Härz a Verstand, esou wéi se dat zu Salem a Baden-Württemberg nennen, leeschten. Dat gëllt och a besonnesch fir de Clierfer Lycée, wou mer elo virun engem wäisse Blat sëtzen an déi eemoleg Chance hunn, aus de pädagogeschen Erfahrungen an de wëssenschaftlechen Erkenntnisser vun de leschte Joren ze léieren.

Dacks feelt et eise Lycéeën un der néideger Convivialitéit an un der erfuerderter Rou, déi néideg sinn, fir eng Atmosphär vu guddem Léieren ze begënschtegen. Méi a méi ginn d'Enseignanten an administrative Chargen ënner a fanne manner Zäit, fir Akzenter op reng didakteschem Plang ze setzen. Et heescht dofir ëmzedenken an den Unterrecht, d'Léiermethoden, d'Léierkultur also, an d'Léiermaterial an de Mëttelpunkt ze stellen.

Fir eis als DP gëllt: Wat den Enseignant mécht, dat zielt. Seng Persoun, seng Perséinlechkeet si wesentlech Elementer am Léierprozess. Beim Opbau vun enger neier Schoul zu Clierf sollt mer eis dat besonnesch virun Ae féieren.

Mir sollen doriwwer eraus awer och derfir suergen, datt de Clierfer Lycée net nëmme Klassen am ënneschten Zyklus kritt, mä och a grad Formatiounsweeër am ieweschten Zyklus. Dat ass e Must, soss riskéiert déi nei Schoul onattraktiv ze ginn, well déi Jonk se no dräi Joer schonn nees verlooosse mussen.

De Clierfer Lycée däerf also keng Tëschestatioun sinn. Dat wier fatal fir seng Entwécklung, an dat däerfe mer net zouloossen. Et bleift ze hoffen, datt de Bau vum Clierfer Lycée elo endlech ugepaakt gëtt. Pünktlech virun de Wahlen am Fréijoer 2014 wäert ee Minister uewen op engem Bagger sëtzen, deen op den neie Lycéesstanduert gefouert gouf, fir den éischte Spuetestéch ze vollzéien oder stolz...

► **M. Gast Gibéryen (ADR).** - An d'Deputéierte stinn alleguerter ronderëm.

► **M. André Bauler (DP).** - Firwat och net, Här Gibéryen?

► **M. Gast Gibéryen (ADR).** - Ech wëll just soen.

► **Une voix.** - Dir vläicht och um Bagger.

► **M. Gast Gibéryen (ADR).** - Net datt déi vergiess ginn. Net datt déi vergiess ginn.

► **M. André Bauler (DP).** - Oder stolz wéi Oscar wäert e Minister mat enger Traufel an d'Bëttonsspeis stiechen, fir de Grondsteen ze leeën. Ech hunn d'Bild scho virun Aen. E Bild, op dat d'Leit aus dem Clierfer Kanton zënter dem Ufank vum Jorhonnert gewaart hunn. E Bild, dat keng Selbstverständlechkeet ass. E Bild, fir dat an der Regioun jorelaang gekämpft huet misse ginn.

Wann dann de Spuetestéch vollzunn ass, dann ass eng quasi „never-ending story“ bal um Enn ukomm, esou datt mer hoffentlech an e puer Joer déi éischt Jugendlech an dës Schoul schécke kënnen. Ech soen dofir nach eng Kéier all deene Merci, déi zu dësem fir d'Éislek liewenswichtige Projet bäigedroen hunn. Merci fir hiren onermiddlechen Asaz. Merci, datt se et net opginn hunn, un dese Projet ze gleewen an en op e glécklecht Enn ze féieren. A Merci dem Claude Haagen fir säin ausféierleche Bericht.

► **Plusieurs voix.** - Très bien!

► **Mme la Présidente.** - Merci dann och dem Här Bauler. A mir kéinten direkt virufuere mam nächste Riedner, deen agedroen ass. Den honorabelen Här Adam wann ech gelift.

► **M. Claude Adam (déi gréng).** - Merci, Madame Presidentin. Iwwert de Clierfer Lycée ass jo scho ganz villen gesot ginn, wéi mer - wéi den Här Bauler gesot huet - am déiwe Wanter iwwert de Bau vun deem Lycée hei an der Chamber geschwat haten. Den Historique ass gemaach ginn. Ganz vill Politiker aus alle Faarwe si gelueft ginn. Hir Wäitsicht ass ervirgestrach ginn.

déi gréng waren och derbäi. Ech erënnere un dem Deputéierte Robert Garcia seng Motioun, déi schonn de 14. Juni 2001 hei an der Chamber diskutéiert ginn ass an och unanime gestëmmt gouf. Et huet also ëmmerhin zwielf Joer gedauert, bis aus dem Wonsch vun der Chamber e Gesetzesprojet ginn ass. An et wäert och nach e puer Joer daueren, bis datt de Projet steet.

Ech ginn och net méi op den Detail vum Projet de loi vun haut an. Et gëtt jo och eigentlech keen Detail. Mir stëmmen ee Gesetz vu sechs Artikelen. An do hat de Rapporteur, deem ech dann och wëll Merci soe fir seng Aarbecht, alles derzou gesot. An dat, wat am Exposé des motifs steet, dat trëfft och op eis Zoustëmmung. Do ass näischt, wou mir eis kéinten dergéint opposéieren.

Ech wëll just op e puer Aspekter agoen, déi och am Rapport optauchen, an zwar op därer dräi: éischters, Plan sectoriel; zweetens, iwwert d'Offer, déi dann dee Clierfer Lycée ze bidden huet; an drëtens och nach iwwert déi Classes de cohabitation, déi an deem Lycée virgesi sinn.

De Plan sectoriel «Lycées» - et ass schonn interessant, wéi oft sech an der leschter Zäit op dee Plan sectoriel «Lycées» beruff ginn ass, deen ass jo 2005 obligatoresch ginn - baséiert gréisstendeels op d'Donnéen aus dem Schouljoer 2000/2001. An do stinn dann och eng Rei Saachen dran, wou ech mengen, datt et derwäert wier - an ech sinn och ganz frou, datt schonn am Rapport sténg, datt dee Plan sectoriel iwwerschaaft géif ginn -, do stinn eng ganz Rei Saachen dran, déi, ech mengen, mer eis solle kritesch emol zu Gemitt féieren.

Erlaabt mer, datt ech et nach wie vor komesch fannen, datt de Kanton Miersch zu engem groussen Deel dem Centre nord zougeschloen ass. Dat trëfft sech zwar haut gutt, da kann ech als Zentrumsdeputéierte mech och méi no bei deenen Éisleker fillen, fir iwwert de Clierfer Lycée ze schwätzen, mä dat ass awer geographesch gesi liicht gewot, fir Miersch dozoueschloen. An et entsprécht och net onbedéngt der Realitéit.

Miersch selwer ass jo och net als Centre scolaire zrëckbehalte ginn. Et sollt och kee Lycée op Miersch kommen. Haut hu mer zwee anen hallwe Lycée do. Meng gréng Kolleegin hat dat och schonn deemools bei der Diskussioun iwwert de Plan sectoriel bedauert. Ech mengen, wann ech mech richtig kann erënnere, da war et deemools d'Dagmar Reuter-Angelsberg, dat fir déi gréng hei zu deem Sujet geschwat huet.

Interessant ass och, datt an deem Plan sectoriel eppes iwwert d'Gréisst vun de Lycée steet. Do steet zum Beispill, datt ee Lycée classique, deen eng Dominanz mat Classiquesklassen hätt, dee sollt eng Gréisst vun 1.250 Schüler hunn; ee Lycée, dee spezialiséiert wier an all d'Klasse vum Secondaire a vum Technique hätt, dee sollt 1.500 Schüler hunn; an ee Lycée, deen haaptsächlech Schüler aus dem Secondaire technique hätt, dee sollt idealerweis 1.250 Schüler hunn. Wann een dann d'Chiffere kuckt, wéi de Ministère se a senger Chiffres clés publizéiert, da gesäit een, datt mer eigentlech nach wäit dovunner ewech sinn, vun esou idealen Zuelen.

Natierlech sinn dës Zuelen och just theoretesch Zuelen. An awer menge mer, datt mer misste méi Effortë maachen, datt eis Lycéeën zu engem Deel nach vill ze vill grouss sinn. Mir hunn och nei Lycée gebaut: Ech huelen dee Péitenger zum Beispill, dee vill ze vill grouss ausgefall ass. An... Gutt.

Do, mengen ech, wier et wierklech gutt, en Effort ze maachen. Duerfir si mer ëmsou méi frou, datt grad just de Clierfer Lycée eng Dimensioun huet, déi ganz agréabel ass. Et gëtt kee grouse Lycée. An... Ben, da si mer awer och alt erëm net ganz zefriden. Do stelle mer einfach fest, datt déi Offer vum Clierfer Lycée sech op déi ënnescht Klasse vum Secondaire a vum Secondaire technique beschränkt. An dat gesi mer als problematesch.

Et geet Rieds dervun, wéi wann do 1.500 Schüler am direkten Anzugsgebit wieren. Dat hätt et jo eigentlech scho berechtigt, fir méi e grouse Lycée ze bauen. An et soll och emol eng Kéier gesot ginn: Den Zuch, dee vun Ettelbréck op Clierf fiert, dee brauch 26 oder 27 Minuten, deemno wéi een datt een hält. Ettelbréck ass als Schoulzentrum iwwerlaff. Esou ginn zum Beispill och Schüler vun Ettelbréck op Réiden an de Lycée. An d'Verbindunge vun Ettelbréck op Réiden am öffentlichen Transport, déi si wierklech schlecht. Et kéint ee souguer soen, si wieren inexistent. An duerfir ass et mer awer wichteg, emol eng Kéier hei an der Stad



ze soen, datt den Zuch net nëmme vum Éislek an d'Stad fiert, mä e fiert och den ëmgedreinte Wee: E fiert och vun der Stad an d'Éislek.

Et gëtt dann och eng nett Differenz vun dem Clierfer Lycée zum Réidener Lycée. Well de Réidener Lycée war jo vun Ufank u geduecht och fir d'Klassen, weinstens wat den Technique be-
treëft, vum ieweschten Cycle. 2011 hu mer dunn och nach de Secondaire classique bäigestëmmt. Haut ass et schonn zimlech enk mat de Raimlechkeeten zu Réiden, mä - an dat muss ee soen - déi Raimlechkeete waren awer vun Ufank u matgeplangt a matgebaut ginn. Dat maache mer elo zu Clierf net. All Riedner huet gesot, et wier wichteg, datt de Lycée sech géif weiderentwëckelen. Mä mir wëssen awer och, datt dat erëm e Projet de loi brauch. An datt dat net ëmmer esou evident ass, dat gesäit een dann un der Annex Miersch vum Lycée clas-sique Dikrech.

Och hei haten déi gréng eng Motioun era-bruecht, déi d'Regierung opgefuerdert huet ze kucken, ob et net sënnvoll wier, de Mierscher Lycée als eegestännege Lycée auszubauen. Ech faarten, hei dauert et méi wéi zwielf Joer, bis sech eppes beweegt. Dat huet vläicht eppes dermat ze dinn, datt de Kanton Miersch net funktionéiert wéi de Kanton Réiden oder de Kanton Clierf. Et huet vläicht och eppes dermat ze dinn, datt et zu Miersch elo zweeanehallwe Lycée gëtt an datt et dann net einfach ass, ver-ständlech ze maachen, datt e Lycée de proxi-mité sënnvoll ass.

Et ass fir mech awer och ganz flott gewiescht ze héieren, wéi de Spriecher vun der CSV, den Député-maire vu Clierf, op déi wichteg Aspek-ter fir d'Entwécklung vun där ganzer Regioun higewisen huet, wann do en eegestännege Ly-cée kënnt. An ech sinn och zouversichtlech, datt se sech zu Clierf wäerten derhannertset-zen, bis datt hire Lycée och ausgebaut gëtt an och en ieweschten Zyklus kann ubidden.

Ech kommen op en drëtten a leschte Punkt ze schwätzen vun dësem Projet de loi. Et sinn och zwou Classes de cohabitation vun der Éduca-tion différenciée virgesinn am Clierfer Lycée. De Statsrot hat gemengt, mir sollten dat extra an d'Gesetz schreiwen. Mir hunn an der Cham-berskommissioun fonnt, dat sollt net extra am Gesetz stoen. Dat sollt einfach de Regelfall sinn an net eng Ausnahm.

Et bleift awer de Fait, datt mer hei zwee Syste-mer hunn, déi zesummekommen, wou et sech an der Praxis ganz oft erweist, datt dëst Zesum-mekomme ka problematesch sinn. Mir hunn engersäits eng Lycéesdirektioun, an anerersäits eng Direktioun vun der Édifi. Mir hunn d'Perso-nal, wat verschidde Statuter huet. Mir hu Kanner, déi an zwee verschiddene Systemer ageschriwwen sinn.

Trotz guddem Wëllen op alle Säiten ass et net ëmmer evident, datt dat alles direkt klappt. Wichteg ass ganz kloer vu vireran, datt d'Kan-ner aus der Édifi och am System vum Lycée ageschriwwen sinn, also eng double Inscription hunn. Et gëtt och hei gutt Beispiller. Do kann een d'Pionéieraarbecht, déi zu Réiden gemaach ginn ass, kucke goen.

An ech wënschen dann där neier Équipe, déi sech zesummesetzt... An et ass jo esou, datt, wa mer e Lycée plangen, och normalerweis den Direkter ufänt, ier de Grondsteen geluecht gëtt, ier de Bagger fiert. Dat fanne mer wierk-lech gutt. A mir mengen, datt déi Clierfer Équipe sech duerchaus därer un deene positive Beispiller, déi et och bei eis am Land gëtt, mat deenen a Verbindung setzen an do e bëssel-chen ofkucken.

De Clierfer Lycée gëtt e Lycée vun Dimensiou-nen, déi gutt ze iwwerblécke sinn. Dat ass sym-pathesch. An awer menge mer, et wier vun Ufank u méi dra gewiescht. De Cycle supérieur hätt solle matgeplangt a matgebaut ginn.

Trotz dëser Kritik wënsche mer där Équipe, déi dat pädagogesch Konzept da wäert ausfeilen, vill Succès. An en éischte Schrëtt ass gemaach. An ech bréngen och den Accord vun der grén-ger Fraktioun zu dësem Gesetzesprojet.

Ech soen lech Merci.

► **Une voix.** - Très bien!

► **Mme la Présidente.** - Merci. Den nächs-ten agedroene Riedner ass den honorabelen Här Kartheiser. Dir hutt d'Wuert, Här Kartheiser.

► **M. Fernand Kartheiser (ADR).** - Villmools Merci, Madame President. Dir Dammen an Dir Hären, am Numm vun der ADR schléissen ech mech och ganz gären dem Merci un de Rapporteur un. An och gläich e puer Bemier-kungen, déi gemaach goufen hei vu menge Virriedner: eng Freed iwwer eng Präsenz vun der Éducation différenciée.

(**M. Laurent Mosar reprend la présidence.**)

Ech mengen, et ass ganz wichteg, datt Viruer-teeler ofgebaut ginn an datt déi Kanner ëmmer méi integréiert ginn, souwäit wéi et nëmmen iergendwéi geet, och an deen normale Schoul-betrieb.

Eng zweet Bemierkung. Do reagéieren ech op dat, wat den Här Bauler gesot huet iwwert d'Autonomie vun de Schoulen. Dat ass och ep-pes, wat eis um Häerz läit. Mir géifen awer hi-goan an déi Autonomie ganz wäit dreiwen. Ech mengen, et wier gutt, wann d'Schoulen an enger reeller Konkurrenz zuenee géife stoen. An et ass esou, wéi mir déi Autonomie och ge-sinn, déi mir a priori géife begrëssen, nämlech wierklech, fir d'Schoulen an e kompetitiivt Ëm-feld ze setzen am Interessi vun deene bescht-méigleche Resultater.

Bemierkungen zum Clierfer Lycée. Dat eent ass den Transport. Et ass vun e puer Leit drop op-mierksam gemaach ginn, datt d'Zäiten, déi de Kanner zur Verfügung sti fir den Accueil an der Schoul, relativ wäit sinn. Mä dat ass zum Deel eng Äntwert op de Problem, déi net déi wierk-lech Äntwert ass, déi déi Leit am Éislek sech kéinten erwaarden. Déi richteg Äntwert ass, datt de System vum öffentliche Transport am Éislek misst vu Grond op iwwerduecht a verbes-sert ginn. Mir hätten et zum Beispill ganz flott fonnt, wann haut den Transportminister och do gewiescht wär. Well et ass nun eemol e Grondproblem am Éislek, dat jo geographesch awer trotzdeem ganz grouss ass, datt eben d'Kommunikatiounsméiglechkeete substanziell verbessert ginn. Dat ass am Interessi vun de Leit am Norden.

Do komme mer och ewech vun deem e bës-sen denken - an et ass och gutt, datt een et hei gesot huet -, datt den Zuch och dorobber fiert, datt mer déi Region net vernoléissegan, mä als vollwärtig Regioun wierklech gesinn, an och d'Transportkonzept fir d'Éislek ver-besseren.

Dat Zweet ass d'Baue vum Gebai. An do kom-men ech op e Commentaire zrëck, deen d'Chambre des Fonctionnaires et Employés pub-lics gemaach huet, déi de Wonsch ausge-dréckt huet, datt de Bau soll vum Stat realiséiert ginn. An dat huet sécher och domadder ze dinn, datt een awer Kritiken héiert.

Dir kuckt esou, Madame Delvaux, dat steet an deem Gesetz, wat Der eis haut virgeluecht hutt. Am Rapport steet et dra vum Rapporteur als Bemierkung vun der Chambre des Fonctio-naires et Employées publics.

An do ass gesot ginn, et soll vum Stat realiséiert ginn. An dat huet wahrscheinlech och domad-der ze dinn, datt een awer Kritiken héiert beim PPP oder bei anere Konzepter. Et schéngt esou ze sinn, an dat misst een dann iwwerpräiwen, datt de Stat effektiv schlussendlech méi bëleg, méi fiabel baut, an zemoos och wann een d'Nofolgekäschte vun de Gebailechkeete mat arechent.

Dofir och eppes, wat d'ADR schonn e puermol gesot huet: Mir sollen eng Reflexioun maachen, ee Bilan zéie vun deem PPP a kucken, ob net de Stat als Bauhär vun öffentleche Gebaier awer besser dosteet wéi all aner alternativ Konzepter.

Mir grënnen haut oder mir stëmmen e Gesetz iwwert de Clierfer Lycée. An et ass och eng Erënnung, fir eis drun ze erënneren, datt de Clierfer Lycée net deen eenzegen ass, wou mer e bëssen hannendra geroode waren, mä datt mer och aner Projekte vu Lycéeën zrëckgesat ha-ten. Dat heescht net mir, mä awer d'Regie-rung.

Ech erënnere do un de Munnreferer oder den Déifferdenger Projet. An et ass fir eis einfach ganz wichteg als ADR, datt mer dat Ge-samtkonzept vun de Lycéen am Land virun-dreiwen. Datt mer elo de Clierfer Lycée kréien, ass e wichtege Schrëtt, e gudde Schrëtt, mä et ass awer nach net dat Enn, wou mer eis wëlle gesinn an der Verdeelung vun de Lycéesinfra-strukturen am Land. Déi weider Effortë musse gemaach ginn.

Voilà. Et ass u mir, wéi un allen anere virdrun, fir deenen, déi elo herno Schüler, Direkter, Pro-fesser, Schüler am Clierfer Lycée sinn, all Gud-des ze wënschen. Eis bescht Wënsch beglee-de se an déi nei Schoul. Mir freeën eis och op déi Foto, wou mer da gruewe ginn. An net nëmme op d'Foto, mä virun allem op déi Zu-kunft, déi duerno kënnt.

Villmools Merci.

► **M. le Président.** - Merci dem Här Kartheiser. An als leschte Riedner ass den Här Colombera agedroen. Här Colombera, Dir hutt d'Wuert.

► **M. Jean Colombera (Onofhängeg).** - Merci, Här President. Dir Dammen an Dir Hären, fir d'Éischt ee Merci un de Rapporteur, den Här Haagen, fir dee schrëftlechen a mënd-leche Bericht.

D'Schoulinfrastruktur am Norde war viru Jor-zéngten, am ieweschten Norden, vill besser wéi haut. An ech zit'éieren d'Uewerprimärschoul zu Élwen, déi als École moyenne ëmgewandelt ginn ass. Da gouf et nach Komplementarschou-len zu Élwen an zu Clierf. D'Haushaltungs-schoul zu Élwen an och de Cycle inférieure bis zum Passage-Exame waren zu Élwen ugesie-delt. An all dës Schoule sinn ofgeschaaft ginn. Firwat? Dat weess keen! Oder ech weess et op jidde Fall net.

An duerfir ass et ëmsou méi wichteg, datt en neie Lycée zu Clierf implantéiert gëtt. De Bau vum Lycée stäerkt de Kanton Clierf wirt-schaftlech an och strukturell, an nei Aarbechts-plaze ginn hei geschaf. An aner Ballungszen-tren, wéi Ettelbréck a wéi Wolz, déi wäerten dann entlaascht ginn, haaptsächlech wat de Verkéier ugeet. Wat och ze begrëssen ass!

De Lycée kritt seng eegen Autonomie. Dat ass och ze begrëssen. An de pädagogesche Projet an d'Identitéit wäerten d'Haaptaufgab si vum Corps enseignant. Och ganz wichteg ass d'In-klusivitéit. De Projet ass inklusiv, well zwou Klasse vum Centre d'éducation différenciée hei virgesi sinn. Mir hoffen awer och, dass an nächster Zukunft de Cycle supérieur enges Dags als logesch Konsequenz hei wäert offréiert ginn.

An dat gesot, muss ech dann hei nach e puer Mercië lassginn, an zwar un déi eenzel Depu-téierten, ouni déi, wéi ech mengen, de Clierfer Lycée ni gebaut gi wier. Un éischter Plaz dann zit'éieren ech den Député-maire, den Här Eicher, dee sech ganz vill agesat huet, fir dass do ep-pes soll Realitéit ginn. Den André Bauler och, deen huet sech och ganz vill agesat, och ee ganz grouse Merci. An natierlech, net ze ver-giessen, dee legendäre Jean-Pierre Koepp, deen och scho virun zéng Joer sech ëmmer mat Questions parlementaires ganz staark gewisen huet, fir der Clierfer Regioun do e Lycée ze ginn.

► **Une voix.** - Très bien!

(**Interruptions diverses**)

► **M. Jean Colombera (Onofhängeg).** - Och alleguerten déi, déi ech vergiess hunn. Okay, dat gesot, wënsche mir der neier Équipe da ganz vill Succès a mir wäerten och dëse Projet stëmmen.

Merci.

► **M. le Président.** - Merci dem Här Colombera. An domadder ass d'Diskussioun of-geschloss an d'Wuert kritt d'Unterrechtsminis-terin Mady Delvaux-Stehres.

► **Mme Mady Delvaux-Stehres, Ministre de l'Éducation nationale et de la Formation pro-fessionnelle.** - Merci, Här President. Also, esou wéi all meng Virriedner, déi sech jo hei zu wierklech rhetoreschen Héichleeschunge ge-schwongen hunn, freeën ech mech selbst-verständlech och iwwert de Vote vun engem neie Lycée. An dësem Fall de Clierfer Lycée, dee jo eng laang Virgeschicht huet, wéi meng Vir-riedner hei alleguerten et ënnerstrach hunn. Ech mengen, et ass gutt fir d'Regioun. Et ass haaptsächlech gutt fir d'Kanner, déi do wun-nen, dass se kuerz Weeër kréien, fir an d'Schoul ze goen. Esou wéi Dir alleguer hoffen ech, dass dee Bau geschwënn, dass de Bagger geschwë fiert. Ech sinn och zouversichtlech, dass dat esou antrëtt.

Mir ass et nach wichteg ze ënnersträichen, dass selbstverständlech de Konzept esou ass, dass dee Lycée kann ausgebaut ginn, an dass et méiglech ass, d'Offre scolaire do no uewen ze erweideren. Wichteg ass et mer och ze ënnersträichen, dass, wéi an all Neibau, wéi an all neie Lycée, dee mer geschaaft hunn, ëmmer Raim virgesi sinn, fir dass d'Classes de cohabitation do kënne fonctionnéieren, well mer gären dat Zesummeliwen oder esou e Rapprochement vun deene Jonken géife gäre gesinn.

An dann ass jo interessant un dësem Projet, dass een eng Offer huet, déi de ganzen Dag ofdeckt, wat net heescht, dass et eng Obliga-tioun ass fir d'Schüler, de ganzen Dag do ze bleiwen, mä dass d'Méiglechkeet besteet, dass se vu moies hallwer aacht bis am spéiden Nomëtteg kënne an der Schoul bleiwen. Dat alles ass e Projet, dee muss entstoen, nodeems dann en Direkter genannt ass, dee sech eng Équipe zesummesicht.

Mat menge Virriedner wëll ech soen, dass dee Lycée eng Chance ass fir d'Regioun, mä et ass och eng Érausforderung, dass de Lycée e Suc-cès gëtt. Mä vu dass e vun der ganzer Regioun gedroe gëtt, sinn ech immens zouversichtlech, dass dat klappt. An dofir wënschen ech och dem Lycée, senger zukünfteger Équipe an all de Leit, déi dozou stinn, ganz vill Succès!

An ech mengen, all déi aner Froen, déi opgeworf gi sinn iwwert de Plan sectoriel, déi kënne mer sécher an der nächster Zukunft eng Kéier diskutéieren. Ech mengen net, dass een e Plan sectoriel iwwer 30 Joer kann d'selwecht

bestoe loossen, mä et soll een dorobber zrëck-kommen a vun Zäit zu Zäit iwwerpräifen, ob déi Dimensiounen zum Beispill, déi mir fir e Ly-cée virgesinn hunn, déi ech perséinlech vill ze vill grouss fannen - ech sinn éischter fir méi kleng Strukturen, well déi eng aner Conviviali-téit erlaben an en aneren Encadrement vun de Schüler -, mä dat wäerte mer op anere Plazen nach diskutéieren.

Dat gesot, soen ech Merci fir déi breet Zou-stëmmung an ech wënschen, wéi gesot, dem Clierfer Lycée e schnelle Start a ganz vill Suc-cès.

► **M. le Président.** - Merci der Éducation-s-ministes. Domadder wär d'Diskussioun ofge-schloss a mir kommen zur Ofstëmmung iwwert de Projet de loi.

Vote sur l'ensemble du projet de loi 6522 et dispense du second vote constitutionnel

D'Ofstëmme fäntk un. Fir d'Éischt déi per-séinlech Stëmmen. De Vote par procuration.

De Vote ass ofgeschloss an de Projet de loi 6522 ass ugehoff mat 60 Jo-Stëmmen.

Ont voté oui: Mmes Diane Adehm, Sylvie Andrich-Duval, Nancy Arendt, MM. Fernand Boden, Lu-cien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Hauptert, Ali Kaes, Marc Lies, Pierre Mellina, Mme Martine Mergen, MM. Paul-Henri Meyers, Laurent Mosar, Marcel Oberweis (par Mme Nancy Arendt), Gilles Roth, Jean-Paul Schaaf, Mme Tessy Scholtes, MM. Ro-bert Weber, Lucien Weiler, Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, MM. Fernand Diederich, Georges En-gel (par M. Roland Schreiner), Ben Fayot, Claude Haagen, Jean-Pierre Klein, Lucien Lux, Mme Lydia Mutsch, MM. Roger Negri, Ben Scheuer et Roland Schreiner;

MM. André Bauler, Eugène Berger, Xavier Bettel, Mme Anne Brasseur, MM. Fernand Etgen, Alexandre Krieps, Claude Meisch, Mme Lydie Pol-fer (par M. Xavier Bettel) et M. Carlo Wagner;

MM. Claude Adam, François Bausch, Félix Braz (par Mme Josée Lorsché), Camille Gira, Henri Kox, Mmes Josée Lorsché et Viviane Loschetter;

MM. Gast Gibéryen et Fernand Kartheiser;

MM. Jean Colombera et Jacques-Yves Henckes;

M. Serge Urbany.

Gëtt d'Chamber d'Dispens vum zweete Vote constitutionnel?

(**Assentiment**)

Dann ass dat esou décidéiert.

Mir kommen dann elo zum Projet de loi 6550 iwwert de Beruff vum Affekot. Hei ass d'Rie-dezäit nom Basismodell festgeluecht an et hu sech bis elo ageschriwwen: déi Häre Bettel, Klein, Kartheiser an Henckes. D'Wuert huet elo de Rapporteur vum Projet de loi, den Här Gilles Roth. Här Roth, Dir hutt d'Wuert.

13. 6550 - Projet de loi modifiant la loi modifiée du 10 août 1991 sur la profession d'avocat

Rapport de la Commission juridique

► **M. Gilles Roth (CSV), rapporteur.** - Här Pre-sident, Dir Dammen an Dir Hären, de Gesetzes-projet 6550 dréit ëm d'Sproochekenntnisser vun den Affekoten. Mir ënnerscheiden op deem Plang vun den néidege Sproochekennt-nisser an Zukunft do zwëschen zwou Zorten Affekoten.

Engersäits den Affekot mat dem klassesche be-ruffleche Werdegang, dat heescht, deen no sengen Universitätsstudien zu Lëtzebuerg déi sougenannte Cours complémentaires am lëtze-buergesche Recht mécht, duerno op de Bar-reau sech aschreift an dann no senger Stagezäit de sougenannten Avouésexamen, deen haut Examen de fin de stage judiciaire heescht, mécht. Huet hien dee Parcours gepackt, da kann hie sech op d'Lëscht 1 vun den Affekoten aschreiwen a seng eegen Étude opmaachen. Dësen Affekot muss weiderhi sämtlech ad-ministrativ a geriichtlech Sprooche beherr-schen, dat heescht Lëtzebuergesch, Franséisch an Däitsch.

De Gesetzesprojet fixéiert de genaue sproochle-che Kompetenzniveau elo, deen dës Affekote mussen erreechen, an dat mat Bezuch op den europäesche Referenzkader. Am Franséischen zielt duerfir den Niveau B2 souwuel am schrëft-leche wéi am mëndleche Verständnis, wéi och am Ausdrock, also am Schwätzen. Konkret heescht dat, dass een de wesentlechen Inhalt vun engem komplexen Text muss verstoen. Dat zielt och, wann et sech ëm eng technesch Dis-kussioun a sengem Fachberäich handelt. Et heescht och, sech kënne mat Liichtegkeet mat anere Leit ënnerhalen. Et muss ee schliesslech sech kënne detailléiert iwwer eng large Gamme vu Sujeten ausdrécken.